

Poloma: Timodi pa:ta: yaapo peao wape pea tapaeyekeeki

1 ¹ Polo Ita: mo Ketiso Yesuna: aposolo hali halome. Koda:ma: la: wieke deto hala:eki Ketiso Yesu pa:ta: yama: nikana:ma: moloma: ekina: pi walono yeke Koda:ma: I maleke lia tapaala:me.

² Do wapeta: ya pukipiki weki Timodi neke pa:ta: wape pitolome. Mo Apa: Koda: pita: Ketiso Yesu nika: Tekehali ipilikana:ma: mo tamba: mina:la:eki make a:ta:ma: homa:la:eki make puki lopaasa:eki make neke pa:ta: kina:e.

Keiyae pi pita: hone u tiaasa: pi yaapo

³ Ya apa:na: atekena: atekema: Koda: pa:ta: hone tulao hao haemeke tupa: I make ya hone tekema: ala:ta: ma:nda: na ta:lena: leke koto tupa: kone hone tulao halome. Ima: timba make natena: make neke hone na yonka:lake Koda: pa:ta: yeni pitolo keiyae pi lo halome. ⁴ Mo naka: leke pa:ta: e pankeke lopo haya:eki handoa:eki niminaaso hata: neke handuluekema: Ima: ta:na: pa:la:me. Kutu pua:ka:na:ta: Ima: ta:na: tiekema: homulueke. ⁵ Mo naka: ota: hone tulale ekita: Ima: niminao halome. Naka: aeya: Loisi pita: naka: ama: Yunisi yaapoma: make do mandake hone tulaepe ekita: ya honema:ta: neke pa:ta: make taa ula:me. ⁶ Koto hone ua:eki tekena:ta: Ima: naka: youna: ya kiki ua: pa:ta: yama: Koda:ma: neke pa:ta: pa hameke ka:la: hauta: alupaama:na: halima: ti honiaama:na: po lo hala: tupa: kone do hauta: pa mea tiaaso tiaaso halena: hone u tiaasome. ⁷ Pa ekipeke. Mo Koda:ma: ka:la: Sipitidima:ta: niki yala: yala: na peaasa:me. Kotoeki na pikita: ipika: Sipitidima: mo wele pita:la:eki make pukima: homa:la:eki make hone lu tumbaasa:eki make niki ana:na: ku hala:me.

⁸ Mo nika: Tekehalina: pi walawasa: ekina:ta: nakana:ma: yaala:ma: na homa:peke. Kutaa make I mo Ketisona: e pokawa: ekina: dipula mea pitaalemeke pilu ekina: neke yaala:ma: na homa:peke. Kotoeki na pikita:

mo Koda:ma: ka:la: wele tapu hata: mo Pi Seliapo wala:la: ekina: ka:nda:ta: I yaapo mandake mea tia hapana:e. ⁹Nikita: ipika: wanda:hali hamono yeke Koda:ma: pa:ta:la: mea wi la:la:me. Koto hau pieke ekina: teketa: nikana:ma: epeke hau puma: ekina: dia:pate pa ipikana:ma: a:ta:ma: homolo hata: ipika: hone pieke ekima: kone niki wi la:la:me. Koda:ma: do kenke ai na wepia wina: leeke pita:ma:ta: do a:ta:ma: homa:la: hauta: niki miomono yeke Ketiso Yesu pa:ta: yama: wina: leekeme. ¹⁰Pate ameta: mo nika: da:taasa: hali Ketiso Yesu ipika: a:pa:la:eki pa:ta: yama: peneme yaala:me. Mo homa:la: ekina: wele ipikana:ma: paeyaaso hata: mo Koda:na: Pi Seliapo pa:ta: yama: deto hala:eki peneme yaala:me.

¹¹Koto Pi Seliapona: la hala:la: hali make aposolo hali hata: moka:la: tiaaso hali hano yeke Koda:ma: I maleke lia:me. ¹²Kota: Ima: koto haumanu pua: ekina: ame do ka:nda:manu minolopate pa Ima: yaala:ma: na homolome. Pa ekipeke. Mo Ima: ya hone ti lalo halita: ota: hone ulume. Ya honema:ta: mo ipikana:ma: I ka:la: haumanu ipikana:ma: mo hande ipika: Nate tieke epena:yeke ana:na: handeteke hao hapeke ya:la:me.

¹³Nakana:ma: pi epeke tupa: waluekema:ta: Ima: neke pa:ta: waloa: pi kone hone wia wala:tiki pu hapeke. Kutu pitolo hata:ta: mo Ketiso Yesu pa:ta: hone tulao pukima: homolo hata: pea:peke. ¹⁴Mo neke pa:ta: ka:la: epeke epeke hau manuta: ota: wopu handeteke ke haluekema: kota: nakana:ma: mo nika: puki pa:ta: pila: Holi Sipitidina: wele peaasa: ekina: welema: wopu handeteke hapeke.

¹⁵Mo Eisia potopinisi haleme wanda:hali paeyao make mo hande Paidia:lisi pita: Hemodionisi koto hali yaapo tonka:na: I mina:pa:lao peleme ekita: neke hone wotu witeleme. ¹⁶Mo hande hali Onesipotasima: hoto paeyao I ta:na:ma: homa: tiao hayeke handaa Ima: mo Tekehalima: ipika: wekiwanda: pa:ta: a:ta:ma: homena: honke alome. Pa ekipeke. I do dipula pilu ekina: ipikana:ma: yaala:ma: na homea:me. ¹⁷Kotoeki na pia:pate ipikana:ma: Loma: da opolo a:paata: koto kone I weitia pomu haota: handa: wia:me. ¹⁸Mo hande Nate tieke opolo epea:ka:na:ta: Koda: ipika: a:ta:ma: homa:la:eki koto some pa:ta: halena:e. Mo hande Epesese nane haoma: toma:na: Onesipotasima: tamba: mu hata: pia: hau paeyaota: nakana:ma: ota: handeleme.

Ketiso Yesuna: kakena: homa hala: a:ndeli miniki hali

2 ¹Ya weki neke pa:ta: dupa alome. Mo Koda:na: a:ta:ma: homa:la: ekita: mo nika: Ketiso Yesu ameḷe ta:ma:ni pitolo hata: minoloma:me. Koto a:ta:ma: homa:la:eki nakana:ma: minele ekina:ta: honkopu hao hapeke. ²Ima: wanda:hali eleke elekena: leke popelekena: waloeke opi mana: pi manuta: kota: nakana:ma: meaata: mo hone epeke tupa: u paleke hata: mandane da wanda:hali ana:na: wala:peke ya:la: wanda:halita: nakana:ma: moka:la: hale hale pea:peke.

³Ketiso Yesuna: epeke a:nda: peaasa: hali hata: mo ipika: wanda:halina: ka:nda:ma: homa:la: ekina: ka:nda: mandaneeki nakana:ma: mea:peke.

⁴Ami hali homekema: ami hali hata:ta: ipika: you halina: kakena: homu haluekema: pa mo da wanda:halina: pu haleme haumanu tonka:na: apa:tao na pilieke. ⁵Kutupa make mo telepo tiekemanu lo hala: halima:ta: mo telepona: pi ula: ekimanu na tolu haya:ka:na:ta: kota: tombo watao yenki mia:peke na ya:la:me. ⁶E handeteke hala: halima: ipika: e tieke wopu poko hala: ekina:ta: mo ena: ne tanu ekita: ipika: amba:la milieke. ⁷Ima: alo pita: hone wopu wia:peke. Koto pi hone uelena:ta: Tekehalima: neke tamba: milieke.

⁸Nakana:ma: mo hande homa paa tiaeyeke yeke Deipidina: tapake hali Yesu Ketiso hone u hapeke. Ima: mo Pi Seliapo waloa:ka:na:ta: kota: koto pi kone walo halome. ⁹Ima: do Pi Seliapo walo halo ekina: ka:nda: tieke mu halome. Kutaa make Ita: pi yamba:la:la: hoke hali leke seni puma: tonkao uleke halome. Ita: koto pa:leke halopate pa Koda:na: pita: kutupe seni puma: na tonkao ula:me. ¹⁰Ima: mo Koda:ma: ma:leke lila: wanda:hali tamba: muluekema: do ka:nda: paeyaota: na kiake mea tu halome. Mo wanda:halita: Ketiso Yesu pa:ta: yama: a:pa:la: na paelo pa:la: pa:la: tiekema: wina: la:la: da:taasa:eki mina:yeke Ima: do ka:nda: tu moneao halome.

¹¹Dota: ota: pi alo pie.

Nikana:ma: ipiki ame:le mandake a:nda: homoma:ka:na:ta: kota: ipiki ame:le mandake kone da:taa halumeke.

¹²Kutupa nikana:ma: mo ka:nda:manu epena: kone aela: bao haoma:ka:na:ta: kota: ipiki ame:le mandake piki you wanda:hali kone halumeke.

Nikana:ma: ipiki a:nda: kiaoma:ka:na:ta: kota: ipikana:ma: niki make kiaalieke.

¹³Nikana:ma: nika: hone ti lao halumeke laa kone pa hone na ti lao haoma:ka:na: kone kota: kutu pumonopate pa ipikana:ma: ipika: pulueke laa la: ula: pita: ota: na tunkulieke.

Pa ekipeke ipikana:ma: ipika: titina: la: ula: pi kialuekema: wetepe topo piki pi ma:nda: lapeke na ya:la:me.

¹⁴Do ekita: naka: wanda:hali hone u tiaaso hata: la halo hapeke. Kutu pika:na:ta: kota: Koda:na: leke popelekema: iki kinki pitolo hata:ta: dupa lapeke. Ikana:ma: mo pi teke manuna: tekema:ta: pi yokaalu alu pu ape ape na lapa:peke lapeke. Kutu piki hauma:ta: ma:nda: na tamba: mulu pa:la:pate mo opilimi wanda:hali pa:ta:ta: paa hoeyaasa:eki homeke wilieke.

Ipika: ena: pi lawaaso haena: e poka:la: hali

¹⁵Nakana:ma: ota: epeke e poka:la: hali haluekema:ta: neke yala: peaama:na: naka: titina: honeta: Koda:ma: I pa:ta: ta:na:ma: homena:e hone

witolo hata: e poko hapeke. Koda:na: ota: pi tikitiki wala:la: hali hata:ta: koto hau pu hapeke. ¹⁶Mo wanda:hali Koda: mina:pa:lao papate haena: la:la: epe na piki Koda: mataake pimanu la kite me pi manuta: hoki wala kiao pua:peke. ¹⁷Koto Koda: mataake pi la kita:la: pita: mo mindiki na:paasa: bole kema: handa:la:me. Kutu piki pita: yaapo hali Haimeniasi pita: Pailita:si yaapoma: walepeme. ¹⁸Koto hali yaapoma:ta: mo ota: haumanu mina:pa:laepeme. Kutu polo hata: mo nika: homa paa tialo poloma: ekina: ipilikana:ma: alota: Nikita: amba: homa tiao haloma:me alepeme. Koto alepe ekima:ta: mo mandane pi mina:la: wanda:halina: hone tulaaseme ekita: hoeyaasepeme.

¹⁹Koda:ma: nokopeeke taka:lake pinkita: da:la:pa pa:la:me. Koto pinkina: pi yaapo wape pea ula: ekita: dupa. Tekehalima: ipika: wanda:halita: ipika: amba: hando ulume laa wape pea ula:me. Kutupa pi ma:nda: make dupa. Ma:nda: hali epima: Ita: mo Tekehalina:eki halome lea:ka:na:ta: kota: mo hokeeki paeyao ota: mina:pa:lao hoki walaa pua:peke ya:la:me pi yaapo wape pa:la:me.

²⁰Mo hamoko da tieke pa:ta:ta: paata: piki make noka: wiki kawaso ta:ta: ta:ta: pikieki wopu ula:me. Mo kawaso manuta: silipama: make koloma: make wa:peleme. Kutupa mandane ekita: tima: make kenkema: make wa:peleme. Do kawaso mandaneeki manuta: hau tieke pitolo mea:pekeeki wina: laata: mandane ekita: pa nate paeyao pa mu hapekeeki wina: la:la:me. ²¹Hali ma:nda: epima: mo hoke hau paeyaona: hai a:nda: ipiki pa:ta: na ta:lena: lea:ka:na:ta: kota: ipikita: ipika: Tekehalima: ta:ta: piki hau tieke ma:nda: peaena: mea haena: lelieke. Pa ekipeke. Mo somema: ipika: Tekehalima: hala:la: epeke emanu pokaaluekema: tikitiki yao ula: ale manuma: handa hala:me.

²²Nakana:ma: mo wekihali hata: mo wekiwandikima: ika: lokena: hoke hone u alualu pita:la: haumanu wendia:peke. Nakana:ma: mo iki tamba: mina: ika: yako piki pukima: ika: Tekehali o laa wi lo haleme wanda:hali ame:le hata: mo tikitiki piki hau make hone tulaasa:eki make pukima: homa:la:eki make a:nda: peliaasa:eki make muluekema: hone ha paleke pua:peke. ²³Mo teke na wiki o teke na handeke pi yokaalu alu pita:la:eki manuta: hoki wala pua:peke. Pa ekipeke. Koto hau manuma:ta: ape ape mea la:tialiekeyeke loa:me. ²⁴Mo Tekehalina: e pokaasa: halima:ta:ta: ape ape na lelieke. Kotoeki na pikita: ipikana:ma: wanda:hali paeyao pa:ta: a:ta:ma: homolo epeke disa hali hata: ika: pu hoeyaaseme haumanu pa:ta: ka:nda:ma: ai na homake yu wia hapeke ya:la:me. ²⁵Ipikana:ma: mo pi tunkuleleme wanda:hali tikitiki yaasota: kimelema: hauma:ta: yopu pu halieke. Koto hau a:nda: pu haya:ka:na:ta: kota: ikita: Koda:ma: iki pa:ta: waleke wiaya:ka:na:ta: ika: pukimanu topo pea mo ota: pina: hone ti laemeka:na:ta: ²⁶kota: ika: honemanu paa epeke tupa: mea lopao wilimikie. Kutu pimikina:ta: kota: ikana:ma: Sadanina: hone pa:la:eki peaena: miniki hala: bisale pa:ta: pambelemeeeki hola:pa yopua halimikie.

Nate paelia: toma:na: pea:peke yolo pa:la: ekimanu

3 ¹Mo nate paelia: toma:na:ta: ka:nda:ma: homaasa: haumanu wopu ipiliekena: hone wopu wia hapeke. ²Koto paelia: dina:ta: wanda:halima: do haumanu pu halimikie. Ikita: I I alo hata: make pasa:tei hau wopu pita:la:eki make hakoko liki pimanu lo make handaena: honemanu u make yala: peaaso hata: make kikama: handeke some ala: hoke pimanu make lo halimikie. Kutaa make ateke inkikina: kakena: na homo make keiyae loluekema: hone na u make yeni hau pita:la: haumanu hone na wiki wanda:hali make halimikie. ³Ikana:ma: a:ta:ma: homa tamba: na mu make pa paeyaaluekema: hone na u make hoki nane laasa: wanda:hali hata: make hone mata:pa pua hata: wanda:hali hoeyaasa: hau pu make kika ma:na:na: hau leke pita:la: hau make pu halimikie. Mo wanda:halima: epeke haumanu honditi pu halimikie. ⁴Kutaa make ikana:ma: yankeke kone lina: ma:na: yapa: mu a:nda: lombo make homa:la: ale teke na hake haumanu pu make ika: honema: ikita: tieke haloma:me hone witolo hata: Koda: pukima: na homeketa: pa ika: loke ta:na: peaasa: alemanu pa:ta: pukima: homo halememe. ⁵Ikana:ma: mo Koda: pa:ta: yeni pita:la: hauta: pa pea:tiki pea:tiki pu halemepate mo yenina: wele pita:la: ekita: hoki walaa kiaaso halememe. Kutu piki wanda:hali amele apa:tao na hapeke.

⁶Kutu piki mandane haliwekima:ta: mandane hone wopu na wiki wanda:weki homu pealuekema: ika: da pa:ta: yopu siki honda: pamba pu halememe. Kutu piki wanda:weki ika: hoke hau manuma:ta: ika: honemanu ka:nda: peaota: ika: lokena: hoke hone pa:la:eki manuma: iki yola: mea aneya moneya pu hala:me. ⁷Do koto wanda:wekima:ta: mo pimanu opua hone uluekema: taapemekepate pa mo ota: pina: teketa: miniki hapa:peke na ya:la:me. ⁸Mo hande Dia:nisi pita: Dia:mbitisi yaapoma: Mosesi pa:ta: a:nda: lipikime. Koto some yaapoma: pipiki tupa: kone mo hande haliwekima:ta: mo hande ota: pi pa:ta: make a:nda: lu halememe. Ikana:ma: ika: hone tikitiki na yaaso hata: kone Koda: pa:ta: hone tulaapeke ekina:ta: iki ana: na paleke handaata: Koda:ma: iki kiao hala:me. ⁹Koto haliweki ika: hauta: wopu na daeyalieke. Mo amba: haemeke wanda:halima: mo hande Dia:nisi Dia:mbitisi yaapona: pamba: na piki hau pipikieki handolo pimiki tupa: ame make wanda:halima: koto haliwekina: pamba: na piki haumanu handilimikie.

Paeyaaso mana: pi

¹⁰Pate nakana:ma: I yaapo neke mandake pomi pita:ma:ta: mo hande wanda:hali pa:ta: waloa: pi manuta: nakana:ma: amba: opua hone wilime. Kutaa ya hau pita: ya pua:eki yaapota: nakana:ma: hone wilime. Kutaa Ima: ya hone tulaaloeki make wanda:halima: pi mina: soka:la:ma: homa

na kiake pa handeteke haloeki make ya a:ta:ma: homa pukima: homoloeki make ka:nda:manu epena: kone Ima: honkopu hao daola haloeki make nakana:ma: handeleme. ¹¹Mandane haliwekima: I lu yombu moneao halemeke make tanda wopuna: moneao haloeki make handeme. Mo hande A:ndioko da pa:ta: make Aikoniomo da pa:ta: make kutaa Lisita da pa:ta: make do da tepo haliwekima: I ota: hoeya: hau lu yombu haena: kone pa taka:lao haowa: ekita: naka: hone wilime. Kutu pimipate kone mo Tekehalima: do koto hau paeyaona: tukiki pa:ta: kone I wopu pa:ta:la: moneao haya:me. ¹²Aowe. Koto tupa: kone mandane wanda:hali epima: Ketiso Yesu pa:ta: ta:ma:ni pea hata: Koda:na: pi tolu haemeka:na:ta: kota: iki pa:ta:ta: mandane haliwekima: mo hoeya: hapu lu yombua:la: haumanu pilimikie. ¹³Hoke hau pu hala: haliweki make yayapiki hau pita:la: haliweki make ika: ika: kone makea alu alu pitolo hata: ika: hoke hau manuta: ota: mea daeyalimikie.

¹⁴Kutu pu halimipate neketa: hande waleeke opi ota: pimanu wopu miniki hale ekita: na mina:pa:lapeke. Hande neke walea: tapaketa: naka: hone wilime. ¹⁵Kutaa make mo hande Yakopiki Baibolona: wape pea ula: pi manuta: neke wekisiki hata: kone kini pea opua:tiki a:pa ame make paa opuolo haleme. Nakana:ma: mo Ketiso Yesu pa:ta: hone tulaaseeki pa:ta: yama: mea:peke da:taasa:eki muelena: u tiaasa: honeta: do Baibolona: wape pea ula: pi manuma: ka:la:me. ¹⁶Mo Baibolona: wape pea ula: pi paeyao wape pina:ta: haliwekina: hone pa:ta: Koda:ma: wala: tiaaso haena: wape pimikime. Koto wape pa:la: pima:ta: wanda:hali pa:ta: ota: pimanu waluekema: make hoke hau peaama:na: sa:sa: puluekema: make hoi piki haumanu tondepealuekema: make kutupa epeke hapeke ekina: mana:manu loluekema: wape pea ula:me. ¹⁷Kutu peaapeke ya:la: ekima:ta: mo Koda:na: e pokaasa: somema: epeke hau paeyao ana:na: peaena: tikitiki yao haena: lelieke.

Koda:na: ota: pimanu homeke walo hapeke

4 ¹Mo pa haleme wanda:hali pita: amba: homemeke wanda:hali pea telipulu pa:la: Ketiso Yesu pita: Koda: yaapona: leke popelekena: telepo pi na alopate Ketisota: mo wanda:halina: handeteke hao halo pa:la: Kini hali ipiliekeyeke ya pukima: ka:nda:ma: homolo haena: Ima: neke pa:ta: dupa:pekee alome. ²Koda:na: pi walo hapeke. Kutu polo halena: wanda:halima: opuluekema: ta:na:ma: na homolo haena: make o ta:na:ma: homa opitolo haena: make na kiaake pa walolo walolo ombu hapeke. Nakana:ma: mo puki nala: pima: make mineke pima: make kutupa mo hone u tiaasa: pima: make koto pi manuma: ikana:ma: epeke honemanu wina: loluekema: ta:na:ma: homa: tiaaso handeteke hao hapeke. ³Wanda:halima: mo epeke mana: pi wopu na opulu pa:la: nate make ipilieke. Kutaa make wanda:halima: ika: hone pa:la: ekimanu pitolo hata:

ika: opulueke hone peleme pimanu la hala:peke yolo pa:la: haliwekima: iki handeteke haena: handa: mea:tiki pilimikie. ⁴Ikana:ma: pa tindemanu homeke opuluekema: mo ota: pita: na opiki hoki walaa kiaalimikie. ⁵Kutu pina: kone neke pa:ta: ekipiki haumanu epena: kone kota: koto ekima: neke hoeyaama:na: naka: hone lu tombua tombua pitolo hata: hapeke. Ka:nda:manu epena: kone daola hata:ka:na: mo Pi Seliapo wala:la: hali hata: e poko hapeke. Kutupa neketa: Koda:na: e pokaasa: hali hata: naka: ka:la: e poko hapeke.

⁶I pa:ta: epolo pa:la: hauta: dupa. Mo hande hoteke lia hala:la: tupa: I lu peleme nateta: teke pa:ta: ya:la:me. I do kenkena: haloeki paeyaalo polo nate teke pa:ta: ya:la:me. ⁷Ita: mo hotoneli kita:la: ekina:ta: ya wele paeyaoma: epeke tupa: aiya pua mo tombo epeke tupa: watao halome. Kutupa make mo ya Koda: pa:ta: hone tulaalo ekita: na mina:pa:lalome. ⁸Koto ekina: mo tikitiki pea haeme wanda:halima: ika: lombei pimiki ekina: mea:peke yenki tieketa: Ima: putupiliki miono yeke pa ula:me. Do koto ya lombei polo ekina: yenkita: mo Tekehali nika: tikitiki teli peaasa: halima: mo epolo pa:la: nate tiekena: I pa:ta: kilieke. Koto yenkita: I pa:ta: homeke na kulu pa:la:pate pa mo mandane ipiki peneme yaena: yeke pukima: homolo handeteke hao haleme wanda:hali pa:ta: tonka:na: halieke.

Polona: ale manuna: pimanu

⁹Nakana:ma: koto kone I pa:ta: ai ipuluekema: taapo hapeke. ¹⁰Dimasita: do kenkena: hauna: hone wopu pieke ekima: I na leeke mina:pa:lao mo Desalonaika da nane pua hala:me. Ketesinisita: Ka:leisia kenke nane pua hala:me. Taitasita: mo Da:lemeisia kenke nane pua hala:me. ¹¹Luku homeke homeke I yaapo halopa:me. Neke ipulu hata:ta: Maka handa: mua:tiki a:pa:peke. Ipikana:ma: I tamba: mina: yeke loa:me. ¹²Tikikasita: Epesese nane tapaowa:me.

¹³Ya kosa: dauta: mo Todoa:si da hala: hali Kapusima: wia hawaena: epoa:ma: neke ipulu hata:ta: mea:tiki a:pa:peke. Ya bukamanu tonka:na: mea a:paaso hata:ta: mo hande hoteke yonkelekema: wa:pa:la: buka manuta: ota: hone na yonka:lapeke.

¹⁴Mo kepete kawai wepu hala: hali A:lekesa:ndama: I pa:ta: hoke hau tieke piekeme. Koto ipika: pieke hauna: yenkita: Tekehalima: ana:na: halieke. ¹⁵Mo somema: nika: waloloma: pina: a:nda: wopu lia:me. Kutu pieke handaa neke make hoeyaama:na:ma: wopu handeteke hapeke.

¹⁶Mo pi yokaalu puma: natena:ta: Ima: ya pua: haumanu waluekema: titina: hombo peaowa: dina:ta: mo I tamba: mina:la: hali paeyao homeke a:nda: na hake iki paeyaoma: I mina:pa:lao pememe. Koda:ma: ika: pimi hoke hauta: hone yonka:laena:e. ¹⁷Kutu pimipate mo Tekehalima: I teke pa:ta: hata: I wele peaya:me. Kutu pia: ekima:ta: mo pi na miki wanda:hali

paeyaoma: opina: Ima: mo Pi Seliapo epeke tupa: waloa:me. Kutaa make mo laionima: I lu nena: taapolo pimikieki teke pa:ta: ya:na: mo Tekehalima: I petelea:me. ¹⁸Mo Tekehalima: mo hande hoke hau paeyao pa:ta: I yoka: mea ipika: hepeni nane Kilu Tombuao Hala: ekina: epeke tupa: opolo a:pono lelieke. Mo biki yeiya: laasa:eki paeyao ipiki pa:ta: na paeyeke pa u haena:e. Kutu pina:e.

Paeyaaso pimanu

¹⁹Mo Pisila Akuila yaapo pa:ta: make mo Onesipotasina: tapake pa:ta: tonka:na: ya a:talo pi tapaasome. ²⁰Eta:sitisi ipikita: Kotindi da nane haya:me. Totobimasi yeni hayeke handaa Mailitasi da pa:ta: haena: epoa:me. ²¹Mo kosa: ki ai na epeke haena: kone I pa:ta: ai ipuluekema: taapo hapeke. Yubulisi Pudenisi Linusi Kolodia make mo mandane Ketiso tapake paeyaoma: ika: a:talo pi neke pa:ta: tapaasememe.

²²Mo Tekehalita: naka: temoko yaapo hao haena:e. Koda:na: a:ta:ma: homa tamba: mina:la:eki make iki paeyao ameḷe hao haena:e.